

**Uunga siunnersuut: Suliffeqarnermi innersuussisarneq il.il pillugit Inatsisartut  
inatsisaata nr. 5, 8. juni 2014-imeersup allannguuteqartinnissaa pillugu Inatsisartut  
inatsisaat nr. xx, yy 2015-imeersoq  
(Suliffinnut nittartakkap atorneqarnera)**

### **pillugu**

### **Inuussutissarsiornermut Ataatsimiititaliap**

### **ISUMALIUTISSIISUTAA**

### **Siunnersuutip aappassaaneerneqarnerani saqqummiunneqartoq**

Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortat Siverth K. Heilmann	(Atassut)	siulittaasoq
Inatsisartunut ilaasortaq Justus Hansen	(Demokraatit)	siulittaasup tullia
Inatsisartunut ilaasortaq Aqqaluaq B. Egede	(Inuit Ataqatigiit)	
Inatsisartunut ilaasortaq Nikolaj Jeremiassen	(Siumut)	
Inatsisartunut ilaasortaq Peter Olsen	(Inuit Ataqatigiit)	

UPA2015-imi ulloq 18. marts 2015-imi siullermeerinerup kingorna ataatsimiititaliap siunnersuut misissorpa aammalu isumaliutigisani Inatsisartunut matumuuna ingerlateqqillugit.

### **1. Siunnersuutip imarisaa siunertaalu**

Suliffinnut nittartakkap 2015-imi upernaakkut saqqummiunnissaa Naalakkersuisut kissaatigimmassuk siunnersuut saqqummiunneqarpoq. Suliffinnut nittartagaq nunatsinni suliffeqarnermut tamarmiusumut ikorfartuutaassaaq aammalu suliffiit inuttassarsiukkat suliffissarsiornullu atorluarneqarsinnaasumik takussutissiorneqarnissaannik qulakkeerissalluni. Suliffinnut nittartakkap siunertaa aamma tassaavoq suliffissaaleqisut ikilisinnissaat aammalu sulisartunik ilinniagaqarsimanngitsunik nunanit allaneersunik nunatsinniittunik ikilisaanissaq.

Suliffinnut nittartagaq suliffissarsiuussisarfinnut aamma suliffissarsioruntuut Kalaallit Nunaanni atorfinnik inuttaligassanik suussusersinissamut sakuussaaq aammalu sulisitsisunit atorfinnik inuttassarsiornermi saqqummiisarfissatut imaluunniit sulisartunik suliffissaaleqisunik piginnaasalinnik ujartuinissamut atorneqarsinnaavoq.

Siunnersuutip siunertaa tassaavoq suliffinnut nittartakkap atorneranut malittarisassiat atuuttussat aalajangersaaviginissaat.

## **2. Siunnersuutip Inatsisartuni siullermeerneqarnera**

Inatsisisatut siunnersuutip siullermeerneqarnerani inatsisisatut siunnersuutip siunertarisai annertuumik taperserneqarput.

## **3. Tusarniaanermut akissutit**

Siunnersuut piffissami 10. juni 2014-imit 15. august 2014-imut makkununnga tusarniaassutigineqarpoq:

Namminersorlutik Oqartussani naalakkersuisoqarfii, Kalaallit Nunaanni Sulisitsisut Peqatigiiffiat, NUSUKA, SIK, KANUKOKA, Kommuneqarfik Sermersooq, Qaasuitsup Kommunia, Qeqqata Kommunia, Kommune Kujalleq, IMAK aamma PIP. Aammattaaq siunnersuut Namminersorlutik Oqartussat tusarniaanermi nittartagaatigut tamanut tusarniaassutigineqarsimavoq.

Tusarniaanermi akissutit makkununnga pissarsiarineqarput:

Kalaallit Nunaanni Sulisitsisut Peqatigiiffiat, PIP, Kommuneqarfik Sermersooq, Kommune Kujalleq, IMAK aamma KANUKOKA.

### **3.1 Ataatsimiititaliap tusarniaanermut oqaaseqaataa.**

Ataatsimiititaliaq tusarniaanermut oqaaseqaatissaqanngilaq. Tusarniaanermut akissutit tiguneqartut ataatsimiititaliamit takuneqarput aammalu Naalakkersuisut tusarniaanermut akissutinut ataasiakkaanut nassuaatini nassuaatigisaat tamakkiisuuusut isumaqarluni.

## **4. Ataatsimiititaliap siunnersuummik suliarinninnera**

Partiit akornanni siunnersuut annertuumik tapersorsorneqartoq ataatsimiititaliamit maluginiarneqarpoq. Suliffinnut nittartagaq nunatsinni suliffissaaleqisut atorfiillu inuttassarsiukkat eqqarsaatigalugit suliffeqarnermi nuna tamakkerlugu pitsaanerusumik ataqtigiiitoqalerneranut peqataaqataajumaartoq ataatsimiititaliamit neriuutigineqarpoq.

Ataatsimiititaliaq Naalakkersuisut assigalugit isumaqarpoq suliffinnut nittartagaq sulisussanik nunanit allaneersunik atuinerup killilersimaarneqarnissaanut peqataaqataasinnaasoq, tassami atorfiiit inuttaqanngitsut sulisussanut nunaqavissunut nuna tamakkerlugu allagarsiuunneqarsinnaanerannut suliffinnut nittartagaq peqataaqataasinnaammat. Tamatumta peqatigisaanik sulisussanik nunanit allaneersunik atorfinititsinissamik qinnuteqarnissamut periarfissinneqannginnerminni sulisitsisut nunatsinni sulisussanik naleqquttunik

sukumiisumik ujarlersimanissaat suliffinnut nittartakkap nassatarissavaa.

## **5. Siunnersuutip aningaasaqarnikkut kingunerisassai**

Siunnersuutip piviusungortinnejernerani aningaasaqarnikkut kingunerisassat siunnersummut nalinginnaasumik nassuaatini allaaserineqarput. Taamaalillunilu Naalakkersuisut apeqqut tamanna sukumiisumik misissorsimassagaat aammalu inatsisisstatut siunnersuutip tamatuma piviusungortinnejernerata aningaasaqarnikkut malitsigisanik kinguneqannginnissaa ataatsimiititaliamit tutsuigineqarpoq.

## **6. Ataatsimiititaliap inassuteqaatai**

**Siunnersuut Inatsisartunit akuerineqassasoq ataatsimiititaliami amerlanerussuteqartut Siumumeersut, Atassummeersut Demokraatineersullu inassutigaat.**

**Ataatsimiititalami ikinnerussuteqartut Inuit Ataqatigiinneersut ima tunngavilersuuteqarlutik siunnersuut itigartinneqassasoq inassutigaat:**

Suliffinnut nittartagaq kommunit killeqarfii akimorlugit sulisussarsiortarnermut oqilisaataassaaq aammalu taanna aqqutigalugu atorfii inuttaqanngitsut sapinngisamik annertunerpaamik sulisussanit nunatsinneersunit inuttalerneqartassallutik. Tamanna pissaaq suliffissarsiortut tamarmik suliffinnut nittartakkamut CV-nik, ilinniakkatigut tunuliaquitaasunik, inuussutissarsiortermut misilitakkaniq suliffigerusutanillu nassuaatitalinnik inissiinerisigut.

Siunnersuutillit siullermeernejernerani arlalinnik apeqquteqartoqarpoq akissuteqarfigineqanngitsunik.

Inatsisisstatut siunnersummut nassuaatini suliffissaaleqisut “tulluartussarsiuussassani 2-imma 3-mi” inissisimasut suliffinnut nittartakkamut “suliffissarsiortuunngitsutut” nalunaarsorneqassapput. Tamatumani pissutaavoq inuit tulluartussarsiuussassani 2 aamma 3-mi inissisimasut suliffeqalersinnaassagunik tunngaviusumik piginnaasamikkut qaffassaavigineqarnissaat, qulaajaavagineqarnissaat katsorsarneqarnissaalluunniit pisariaqartimmassuk.

Suliffissaaleqisunik tulluartussarsiuusseriaaseq eqqortumik takutitsinngitsoq arlaleriarluni saqqummiunneqarsimavoq. 2014-2017-imma Suliffeqartitsinermut Periusissiami assersuutigalugu ima allassimasoqarpoq ”innuttaasut naleqqussakkat 1-imittut amerlavallaarujuussuartutut isikkoqarpasippit”.

Suliniut tamanna siunertarisaq malillugu ilumut sunniuteqassanersoq Inuit Ataqatigiinnit isumakuluutigineqarpoq. Isumaqpugut suliniut atorluarneqarsinnaanngippat aningaasat suliniummut tassunga immikkoortinnejartut amerlasuupilussuusut. Taamaassappammi suliassaq taanna allaffissornikkut suliassaalerluni kommuninut suliffissaaleqisunullu pisussaaffinngortinneqaannassaaq. Suliffinnut nittartakkap suliffissaaleqisut amerlanerusut suliffeqalernerannik kinguneqarnissaa Inuit Ataqatigiinnut pingaaruteqarpoq.

Taamaattumillu makku akissuteqarfigineqarnissaat kissaatigaarpuit:

Suliffissaaleqisunik tulluartussarsiuusseriaatsimut immikkoortiterineq suliffittaarnissamut akimmisaarutaalinnginnissaa qanoq qulakkeersinnaavarput? Taama pisoqarsinnaavoq suliffissaaleqisunik tulluartussarsiuussassani 2-mi kukkusumik inissinneqarsimagaanni imaluunniit atorfimmut inuttassarsiukkamut naleqquttunik piginnaasaqarluarluni "suliffissarsiorttuunngitsutut" nalunaarsorneqarsimagaanni. Inunnik suliffissaaleqisunik tulluartussarsiuunneqartunut taama immikkoortiterineq inuit ataasiakkaat ineriarnerannut aporfiulissanngilaq.

Periuseriarineqartup kukkuneqarnera taassumalu ilaatigut piffiit ilaanni eqqortumik atorneqannginnera maannangaaq nassuerutigineqareermat Inuit Ataqatigiinnit isumakuluutigineqarpoq. Suliffissaaleqisunik tulluartussarsiuusseriaatsip inissilluarneqarnissaata tungaanut suliffinnut nittartagaq kinguartinneqartariaqarpoq. Internetikkut iserniarnermik ajornartorsiuteqartoqarnera kommuninilu annertuumik ulapittoqarnera ulluinnarni tusartuarlugu kommunit suliffissaaleqisullu CV-mik suliaqarlillu taassuminnga suliffinnut nittartakkamut inissiinissaat qanoq qulakkeerneqassava? Suliassamik nutaamik tamatuminnga isumaginninnissamut kommunit piareersimanissaat Inuit Ataqatigiinnit assorsuaq pingartinneqarpoq.

Apeqqutinut taakkununnga naammaginartumik akissuteqartoqartinnagu siunnersuut tapersersinnaanngilarput. Aammattaaq oqaatigisariaqarparput suliffinnut nittartakkamut nutaamut nuttarnerulerermik pilersitsisussamut aningaasarpaalunnik maanna immikkoortitsisoqarluartoq aningaasanut inatsimmi nuttarnerulersitsiniarluni aningaasaliissutinut piginnaanngorsaaqqinnermullu aningaasanik amerlanerusunik immikkoortitsisoqanngilaq. Tamanna ataqatigiittooqannginneranik ersarilluinnartumik takutitsisoq isumaqpugut.

Taama oqaaseqarluni isumaliutissiissumilu oqaatigineqartutut paasinnilluni ataatsimiititaliap siunnersuut aappassaaniigassanngortippaa.

---

Siverth K. Heilmann  
Siulittaasoq

---

Justus Hansen  
Siulittaasup tullia

---

Nikolaj Jeremiassen

---

Peter Olsen

---

Aqqaluaq B. Egede